

आकाशवाणी जयपुर—अजमेर
प्रादेशिक समाचार

- प्रदेश रा ऊगणी जिला मांय बारिश रो दौर मंदो पड़बा ऊं साता मिली—आज दौसा मांय भारी बारिश रो रेड अलर्ट, केई दूजा जिला सारू ऑरेंज अलर्ट जारी करी ज्यो।
- मुख्यमंत्री घणी बिरखा रा असर वाळा हलकां रो दौरो कर र राहत रा काम तेज करण रा हुकम दीना।
- राज्यपाल हरिभाऊ किसनराव बागडे पिछड्या अर आदिवासी हलकां मांय स्वास्थ्य सेवावां और मजबूत करण माथे जोर दीनो।
- प्रदेश मांय हर घर तिरंगा अभियान रा तैत न्यारा—न्यारा कार्यक्रम राख्या ज्या रह्या है।

000

प्रदेश रा ऊगणी जिलां मांय लारला चार दिन ऊं व्हे रही जोरदार बिरखा रो दौर आज मंदो पड ग्यो, जिण ऊं जनता ने साता मिली है। हालांकि सिरोही जिला रा माउंट आबू अर आबूरोड समेत केई ठोड़ा आज ई मेह बरस्यो। बिरखा रे कारण माउंट आबू मांय मौसम सुहावणो व्हे ग्यो है। चूरू मांय जोरदार बिरखा रा समाचार है। दौसा, करौली, **जयपुर** अर डीग जिलां मांय आज ई बिरखा व्ही। दौसा, करौली, भरतपुर, धौलपुर अर सवाईमाधोपुर जिलां रा केई गांव अर शहरां रा नीचला हलकां मांय हाल ई पाणी भर्योड़ो है। डीग मांय लगातार बारिश व्हे रही है अर बत्ती बिरखा रे कारण केई गांवां रो संपर्क जिला मुख्यालय ऊं टूट ग्यो है। दौसा जिला रा केई हलकां

मांय आज ई तेज मेह बरस्यो। म्हाणा खबरनवीस बतायो के तेज बारिश पाछे नदी-नाळां मांय पाणी उफण रह्यो है।

.....
करौली मांय दोपहरां तांई व्ही बिरखा पाछे मौसम साफ व्हे ग्यो। जयपुर शहर रा कुछ हलकां मांय संवारे बारिश पाछे तावड़ो निकळ्यो। सवाईमाधोपुर मांय आज बरसात नी व्ही। धौलपुर मांय ई आज बिरखा नी व्हेवण ऊं साता मिली है।

भारी बारिश ने ध्यान राखता थकां रेल प्रशासन ई सावचेती बरत रह्यो है। उत्तर पश्चिम रेलवे रा डिविजनल रेल मैनेजर विकास पुरवार आज रेलवे लेणां रो जायजो लीनो। ई बीचे मौसम विभाग आवता चार-पांच दिन प्रदेश मांय तेज बारिश रा आसार जताया है। मौसम महकमो आज दौसा मांय घणी जोरदार बिरखा रो रेड अलर्ट जदके सवाईमाधोपुर, टोंक, सीकर, करौली, झुंझुनू, जयपुर, धौलपुर, बूंदी, भतरपुर अर अलवर मांय भारी बिरखा रो ऑरेंज अलर्ट जारी कीनो है।

0000

मुख्यमंत्री भजन लाल शर्मा आज दौसा, करौली अर भरतपुर जिला रा घणी बिरखा वाळां हलकां रो दौरो कीनो। वे दौसा जिला रा राहुवास-निर्झरना-लालसोट, करौली जिला रा सपोटरा अर हिंडौन समेत केई हलकां रो हवाई दौरो कर र हालात रो जायजो लीनो। ई पाछे मुख्यमंत्री करौली मांय जिला रा आला अहलकारां सागे मीटिंग कर र राहत रा काम तेज करण रा हुकम दीना। मुख्यमंत्री भरतपुर जिला रा घणी बिरखा वाळा हलकां रो ई हवाई दौरो कीनो।

वे भरतपुर शहर, बयाना, रूपवास अर दूजा हलकां मांय पाणी भरण रे कारण उपज्या हालात रो जायजो लीनो। मुख्यमंत्री पांचना बंधा ऊं गंभीर नदी मांय आ रह्या पाणी सागे ई पाणी भरण रे कारण उपज्या हालात अर बचाव रा काम री अहलकारां ऊं विगतवार जाणकारी लीनी। वे दो दिन पैली बयाना री बाणगंगा नदी मांय डूब जावण ऊं मर्या नौजवानां रा रहवास माथे वां रा पिरवार वाळां सागे मुलाकात कर र वां ने ढाढ़स बंधायो अर मरण वाळां रा पिरवार वाळां ने हर संभव मदद रो भरोसो दिरायो। इण ऊं पैली मुख्यमंत्री जयपुर मांय व्ही तेज बिरखा रे कारण उपज्या हालात रा बारा मांय आला अहलकारां सगो मीटिंग कीनी। वे भारी बारिश रे कारण जयपुर शहर

मांय उपजी साफ-सफाई, ड्रेनेज, सीवरेज, टूटी सड़कां अर दूजी समस्यावां आगी करण सारू संबंधित महकमा रा आला अहलकारां ने जयपुर शहर रो दौरा कर र मुख्यमंत्री रा दफ्तर ने दौरा री रपट पेश करण रा हुकम दीना। मुख्यमंत्री बत्ती बिरखा रा असर वाळा हलकां मांय जनता ने तुरत साता पूगावण रा हुकम दीना। मुख्यमंत्री शहर मांय ट्रांसफार्मरां रा खुला तारां माथे गहरी नाराजगी जताता थकां अहलकारां ने आज ई मौका मुआयनो कर र सगळा ट्रांसफार्मर रा रख-रखाव रा हुकम दीना। आपदा राहत मंत्री किरोड़ी लाल मीणा ई आज घणी बिरखा वाळा भरतपुर जिला रा बयाना पूग र वठे घणी बिरखा रे कारण दो दिन पैली 7 जणां री मौत माथे दुःख जतायो अर दुःखी पिरवार वाळां ने आपदा प्रबंधन विभाग री ओर ऊं दिया ज्या 4-4 लाख रुप्या रा चैक सूप्या। डॉ मीणा कने कृषि विभाग सागे आपदा-प्रबंधन विभाग रो ई जिम्मो है। वे करौली अर हिंडौन सिटी मांय घणी बत्ती बिरखा रा असर वाळा हलकां रो दौरा कर र हालात रो जायजो लीनो। डॉ. मीणा दौसा जिला रा महुआ मांय ई तेज बारिश ऊं परेशान जनता री समस्यावां सुणी। ई बीचे भाजपा रा नुवा प्रदेश अध्यक्ष मदन राठौड़ आज जयपुर मांय खबरनवीसां सागे बातचीत करता थकां कहयो के किरोड़ी लाल मीणा राज्य सरकार रा मंत्री है अर वे वां रो काम कर रहया है। ध्यानजोग है के लोकसभा चुनाव मांय दौसा समेत कुछ सीटां माथे भारतीय जनता पार्टी रा उम्मीदवारां री हार पाछे मीणा मंत्री पद ऊं इस्तीफो दे दीनो हो, हालांकि वां रो इस्तीफो हाल ई मंजूर नी करी ज्यो है।

00000

राज्यपाल हरिभाऊ किसनराव बागडे पिछाडी अर आदिवासी हलकां मांय स्वास्थ्य सेवावां ने और मजबूत बणावण माथे ज़ोर दीनो है। वे आज जयपुर रा राजभवन मांय चिकित्सा अर स्वास्थ्य विभाग री समीक्षा बैठक मांय बोल रहया हा। राज्यपाल कहयो के पिछाडी अर आदिवासी हलकां मांय रीता ओहदा ने भरण माथे खास ध्यान दियो जावणो चाहिजे ताकि वठे री जनता ने स्वास्थ्य रा चोखा सुबीता मिल सके। वे डॉक्टरां ऊं गांवां अर तहसीलां मांय जरूर पूगण अर सेवा भाव सागे काम करण री अपील कीनी। मीटिंग मांय चिकित्सा अर स्वास्थ्य मंत्री गजेन्द्र सिंह खींवर कहयो के केंद्र अर राज्य सरकार री योजनावां असरदार तरीका

ऊं लागू करण सागे हर एक जणा ने बेहतरीन स्वास्थ्य सुबीता मुहैया करावण री कोशिश करी जा रही है।

000

हर घर तिरंगा अभियान रा तहत राज्य मांय आज ई न्यारा—न्यारा कार्यक्रम राख्यी ज्या। जयपुर मांय भारतीय जनता पार्टी री ओर ऊं तिरंगा रैली निकाळी ज्यी। इण ऊं पैली रामलीला मैदान मांय जनसभा राख्यी ज्यी जिण मांय मुख्यमंत्री भजन लाल शर्मा कह्यो के प्रधानमंत्री नरेन्द्र मोदी हर घर तिरंगा अभियान रे जरिये नौजवानां मांय जाग जगावण रो काम कीनो है। वे कह्यो के ई सदी मांय भारत दुनिया रो सिरमौर बणेला।

.....

सभा मांय भाजपा रा प्रदेश अध्यक्ष मदन राठौड, जयपुर री सांसद मंजू शर्मा, विधायक अर भाजपा रा कार्यकर्ता ई मौजूद हा। जयपुर मांय इन्दिरा गांधी राष्ट्रीय मुक्त विश्वविद्यालय इग्नू री ओर ऊं तिरंगा पैदल रैली निकाळी ज्यी। जोधपुर मांय उपमुख्यमंत्री दिया कुमारी तिरंगा यात्रा ने हरी झण्डी बता र खाना कीनी। ई मौके दिया कुमारी कह्यो के प्रधानमंत्री नरेन्द्र मोदी हर घर तिरंगा अभियान रा तहत हर एक जणा ने देश प्रेम री भावना ऊं जोड्यो है। वे हर घर माथे तिरंगो झंडो फहरावण री अपील कीनी।

उपमुख्यमंत्री कार्यक्रम मांय मौजूद जनता रा नुमाइंदां, अहलकारां, कर्मचारियां अर जनता ने तिरंगा प्रतिज्ञा दिरायी। वे नशा मुक्त भारत अभियान रा तैत चलाया जा रह्या हस्ताक्षर अभियान मांय हस्ताक्षर कर र नशा मुक्ति रो संदेश ई दीनो। प्रदेश रा न्यारा—न्यारा जिलां मांय ई हर घर तिरंगा अभियान रा तैत कार्यक्रम राख्यी ज्या। अलवर मांय निकाळी ज्यी तिरंगा रैली ने केन्द्रीय मंत्री भूपेन्द्र यादव सम्बोधित कीनी। बांसवाड़ा मांय मोहन कॉलोनी ऊं गांधी जी मूरत ताई तिरंगा मैराथन दौड़ राख्यी ज्यी। डीग मांय मोटरसाईकिल रैली निकाळी ज्यी। जैसलमेर रा डाबला मांय सीमा सुरक्षा बल—बीएसएफ री ओर ऊं तिरंगा रैली निकाळी ज्यी अर जनता ने तिरंगा झंडा दिया ज्या। कोटा जिला रा दीगोद मांय तिरंगा ट्रेक्टर रैली निकाळी ज्यी। पाली मांय जय जवान जय तिरंगा जय किसान नारा सागे ट्रेक्टर रैली निकाळी ज्यी। श्रीगंगानगर मांय तिरंगा शपथ दिरायी ज्यी। डूंगरपुर

मांय ई वाहन रैली निकाळी ज्यी। चित्तौड़गढ़ मांय जिला कलेक्टर आलोक रंजन अर पुलिस अधीक्षक सुधीर जोशी ` तिरंगा रैली री अगुवाई कीनी। झुन्झुनू मांय जिला प्रशासन अर कृषि विभाग री ओर ऊं तिरंगा ट्रेक्टर रैली निकाळी ज्यी, जिण मांय 200 ऊं बत्ता किसान ट्रेक्टरां सागे सिरकत कीनी। चूरू मांय धर्म स्तूप माथे 75 मीटर ऊंचो तिरंगो झंडो फहरायी ज्यो। गंगापुरसिटी अर सवाईमाधोपुर मांय ई रैली निकाळी ज्यी। हर घर तिरंगा अभियान रा तहत अजमेर मांय सूफी संत ख्वाजा मोइनुद्दीन हसन चिश्ती री दरगाह कने काल तिरंगा झंडा बांटण रो कार्यक्रम राख्यो जावेला।

00000

रक्षा मंत्रालय देशभर री पीएम श्री स्कूलां रा एक सौ बच्चां ने वां रा मायता अर अध्यापकां सागे लाल किला माथे व्हेवण वाळा "स्वतंत्रता दिवस समारोह" मांय सिरकत करण सारू बतौर 'विशिष्ट अतिथि' न्यौतो दीनो है। जळसा मांय सिरकत करण वाळा राज्य रा 6 विद्यार्थियां अर 6 शिक्षकां रा दल ने शिक्षा सचिव कृष्ण कुणाल अर राज्य परियोजना निदेशक अविचल चतुर्वेदी जयपुर रा शिक्षा संकुल ऊं रवाना कीनो। राज्य रो ओ दल स्वतंत्रता दिवस रा खास जळसा सागे ई दूजा कार्यकर्मा मांय ई सिरकत करेला।

00000

न्यारा—न्यारा हलकां मांय चोखो काम करण वाळां ने नई दिल्ली मांय राख्या जावण वाळा स्वाधीनता दिवस समारोह मांय सिरकत करण सारू केन्द्र सरकार कानी ऊं न्यौतो दियो जा रह्यो है। जळसा मांय सिरकत करण सारू न्यौतो मिलण परां बीकानेर रा केंद्रीय विद्यालय नाल री विद्यार्थी चैताली पंवार खुशी जतायी।

00000

सूचना अर प्रसारण मंत्रालय रा केन्द्रीय संचार ब्यूरो रा न्यारा—न्यारा दफतरां री ओर ऊं आज प्रदेश मांय केई ठोड़ां **विभाजन की विभीषिका स्मृति दिवस** रे मौके चित्र प्रदर्शनी लगायी ज्यी। जयपुर मांय प्रदर्शनी लगायी ज्यी प्रदर्शनी रो उद्घाटन जयपुर री सांसद मंजू शर्मा अर स्वतंत्रता सेनानी रामू सैनी कीनो। ई मौके सांसद मंजू शर्मा नौजवानां ऊं आज़ादी रो महत्त्व समझण री अपील कीनी। कार्यक्रम रे

दौरान स्वतंत्रता सेनानी रामू सैनी कह्यो के देश रो बंटवारो महज सरहदां रो बंटवारो नी हो बल्कि आं बगत बण्या माहौल ऊं इंसानियत ने शर्मसार व्हेणो पड्यो हो। ई मौके केन्द्रीय संचार ब्यूरो री अपर महानिदेशक ऋतु शुक्ला बतायो के जयपुर, जोधपुर, अजमेर अर अलवर रेलवे टेशनां सागे उदयपुर, डूंगरपुर अर आबू रोड रा स्कूल-कॉलेजां अर कोटा रा चम्बल रिवर फ्रंट माथे ई ब्यूरो री ओर ऊं विभाजन विभीषिका स्मृति दिवस चित्र प्रदर्शनी लगायी जा रही है। बीकानेर मांय लगायी ज्यी प्रदर्शनी रो बीकानेर पश्चिम रा विधायक जेठानन्द व्यास उद्घाटन कीनो।

00000